

凡神靈首出定四海綏萬邦寔能保護群
黎者夫豈徒哉必其聖德配天又生為男
子如五帝以五德王而後天下稱之曰元
后史臣紀其事功著于典誥垂萬世傳
以不朽記云聲名洋溢于中國施及蠻貊
舟車所至人力所通天之所覆地之所載
日月所照霜露所隊凡有血氣者莫不尊

親故曰配天是已然此言有臨之至聖恐
非薰脩女子之所可幾及盤古來乃有媧
皇御世世紀載其鍊石補天事頗不經摺
紳先生難言之然亦偶見耳其餘稱后者
不過母儀天下秉坤順以佐聖治而已不
聞有百世之後能爲生民禦災捍患錫疇
囿圉也無已則有南海觀音法海無邊可
以普濟羣生然內典所載實是維摩化身

非真女氏此又神道設教不必寔有其人
故典誥無錄有宋年間始誕我菁

順濟聖妃昭應區寓平定海氛時風若時
兩行生有水德之瑞歿有靖海之功史冊
旣載歷二十四命迨

本朝特隆徽號加封天后豈過舉哉亦其
允有功德于民克配上帝故稱之也此蓋
聖祖仁皇帝俯徇輿情之至意著在

今典是以

憲廟親御宸翰錫以神昭海表四字懸於祠
宇若曰虔祀昭應是汝四海之福也於盛
后之護國庇民固宜天下萬世之所瞻禮
八百年來

后之豐功大烈垂昭典誥史臣書之家乘
傳之豈不偉歟世綦忝附玉牒之末裔駕
三江而跨五湖閩隴浙水黃河渤海凌波

若坦途荷

恩孔多不知所報因家藏舊譜記

聖蹟尤詳命男夢龍較而梓之仰體

御書旨意名曰昭應錄將行廣布是為序

乾隆十五年孟春上元日海陽龍溪裔姪
孫世梈薰沐拜題

余少日好遊由惡溪溯閩灘經章貢下惶
恐過彭蠡入湓口沿西塞上襄城時而龍
駒沔河孟津滎澤漳江滹沱易水登萊濟
漯淮泗京口五湖平江羅刹時而荊峽西
江溟澥朱崖凡宇內波濤之險灘濊之艱
其所往返者不啻一而再、而三藐爾侏
儒理不足以勝氣、不足以勝物讀禹貢
道元之書尚自動魄况親履蛟穴寄一葉

于狂瀾哉吟坡公茲遊奇絕冠平生之句
又復放心無際誇眼鉅觀然終不敢自矜
雄豪毫無懼色也而行李屢出絕無戒心
者此何以故蓋皆仗我涇江故里

天后聖靈之所庇輔故能僥倖於不測之
淵以保此微軀也先是吾揭人倡建后宮
囑余襄厥事余樂從之而規模過大衆力
不支停工十有餘年矣後之成否非所敢

卜而羈跡龍岩適舅氏元舉先生偕中表
亨蟠刊昭應錄屬不佞繕寫編輯並董其
事余不敢違尊者之命又喜得藉此區區
以答神庥因玉成善願綴數語于後

乾隆十五年春穀旦順邑司訓李仕學盥
手敬跋

是書原名顯聖錄閩僧照乘所刊已行
於世矣而粵海人家少有藏本皆由

神靈昭應不爽得者珍之琅函供奉不敢
輕褻以故難得槩見一日家大人訪我
閩族都諫先生于京師見其案上曾有
此書請奉以歸示我族人共寶傳之而
聖蹟焜耀日以益彰年來疊頒

隆典并徽號有加矣家君以前書未備又

山僧不嫻忌諱編次未妥所當輯而續之乃抄錄

令典出此編并家乘命小子較而梓之屬余表亨敏李先生編次之刻于龍巖使董其事表先生亦虔心考訂編

本朝制誥御書祀典爲首卷歷代誥敕祭典爲上卷

天后本傳聖蹟爲下卷金冊玉牒燦然鉅

觀以呈家大人定為昭應錄曰神號昭
應自宋及今無有異稱顯其聖者昭其
應也以名是編聿昭聖德於時顯應虔
而奉之其于作福不亦普哉鏤版告成

夢龍謹識

要者此板藏在石碼港仔墘書店文蕙堂

龍邑弟子陳家駒印 式佰部

泉州府晉江縣職員林文時印 肆拾部

舊序

嘗聞天下名山大川之勝每多精華發越之奇蓋地
靈所鍾非生聖人以興道致治而居君師之任則生
神人以理陽治陰而宏天地之化此理之常有必然
者吾莆之外島有湄洲屹大海中一孤嶼也浩浩潸
潸吞吐日月山嶽巽以浮青石嵯峨而映紫而

天妃薰修於其間豈非山川之精華所發越者乎考
諸譜載

天妃吾宗都巡慰公之女也誕降於有宋建隆元年

生而靈異少而穎慧長而神化湄山上白日飛昇相
傳謂大士轉身其救世利人扶危濟險之靈與慈航
寶筏度一切苦厄均屬慈悲至性得無大士之遽變
遽現於人間乎自宋興以來威靈昭赫有禱必應歷
世彌遠聖德彌彰而神功廣大尤著於江淮河海之
中上爲國家保衛轉輸下爲生民拯扶陷溺于具外
國之艤上運之艇賈舸朝泛漁舟晚渡凌海國而無
波泊天涯而若路卽有危瀑驚飈顛連呼吸舟人望
空號祝

神妃閃忽遙臨或香闌座次或火耀桅頭則萬疊狂
濤一葦飛渡帖若安瀾使東南澤國之以海爲田者
得與中州沃壤之民並較桑麻同遊化日神之功大
矣著矣亘古今不可少矣故累代錫命寵頒褒封存
錫湄山宮殿皆奉

天朝遣官創建迄于今璇宮壯麗寶樹披離梳樓指
旭日以迎曦天闕千雲霄而直上噫異矣夫上古有
功德在國家者皆登祀典况

天妃秉坤儀司水德輔國庇民之功著乎百世則謂

神之靈爽直與經天之日月行地之江河運乾坤而
不息可也余自京師歸偶于案頭得顯聖錄一編捧
而讀之不覺悚然而起曰

天妃之英靈昭著有如是乎余忝列秩宗三禮是司
異日肇舉祀典望秩山川奉七聖以祝神庥佐我
國家億萬年無疆之治余將有厚望焉惜乎顯聖一
錄尙多闕略姑盥手而爲之序以俟後之采輯而梓
傳

禮部尚書裔孫堯俞撰

湄洲天妃之神自宋迄今垂八百載歷著靈蹟蘇軾詩
錄有書茲僧照乘刻而傳之夫書以傳信也而神之
信固不待書也古來所傳紀異之書多矣其描寫詭
誕傑特令人讀之愕焉喜焉而且疑焉疑者何異之
也神異蹟不一吾以爲無可疑夫天下變怪莫過於
海今揚帆而來者上有朝紳下至賈鬻靡不瞻拜璇
宮齋心祇奉以出入于蜃樓鼉穴之間卽或陰風怒
號檣傾楫摧寶命頃刻雖上天濟物之意且幾乎窮
而神靈所庇如見其形如聞其聲百禱百應遂能轉

駭浪爲安流凌汪溟若枕席舉人世所詫異不經見之事皆可恃之以爲常又何疑乎雖然福善禍淫天固不爽而善善惡惡之靈神亦弗昧今使天下瞻拜之倫肅邀神貺而違心悖義之輩復無指摘則人將狙狃則玩玩則邪辟之萌又不可遏息則有時一二示警有政所以堅善信之心耳故至誠感神理有必然響應之靈實不可度不可射之妙諸如呼吸可通谷風倏忽者誠有取携神機亘古驚愕意外非他紀異之所爲怪誕者比也則是書之傳又何疑焉